

Supervizor za Brčko izdaje nalog kako bi rješio pitanje kršenja Statuta Distrikta



Supervizor za Brčko, dr. Raffi Gregorian, izdao je danas [Nalog supervizora](#) kojim se Skupštini distrikta Brčko nalaže da uspostavi interni disciplinski mehanizam putem kojeg će Skupština ubuduće rješavati nepoštovanja i kršenja Statuta i njenog sopstvenog Kodeksa ponašanja. Nalogom supervizora se takođe novčano kažnjava gđin Šemso Saković, šef poslaničkog kluba Stranke za BiH u Skupštini Distrikta, u visini iznosa njegove dvije mjesečne plate poslanika u Skupštini distrikta Brčko za njegovo neprimjereno ponašanje kojim je prekršio član 25 Statuta.

Članom 25 Statuta distrikta Brčko nalaže se da se “Poslanici ... u javnom životu moraju ponašati na primjeren, prikladan i etičan način, te obavljati svoje dužnosti savjesno i isključivo za dobrobit Distrikta i Bosne i Hercegovine”.

Gđin Saković, nedavno se ponio na način kojim je narušen ugled distrikta Brčko i Skupštine tako što je na televiziji čiji program se emituje u cijeloj zemlji napravio nepristojnu i uvredljivu gestikulaciju. Njegov propust da preuzme odgovornost za sopstvene postupke i da uputi izvinjenje građanima distrikta Brčko ili svojim kolegama poslanicima u Skupštini daleko je ispod normi koje se nalažu članom 25. Do postupaka gđina Sakovića došlo je nakon što je on protiv međunarodnih zvaničnika javno iznio optužbe za ozbiljno neprimjereno ponašanje i premda je prozvan da predoči dokaze kojima bi potkrijepio svoje tvrdnje on to nije učinio. Njegovi postupci su dio šireg obrasca ponašanja gđina Sakovića koji bezobzirno narušava odnose između bošnjačkih poslanika i

supervizora.

Trebalo je da Skupština distrikta Brčko i predsjednik njegove stranke, koji je bio obaviješten o postupcima gđina Sakovića, budu ti koji će osuditi takvo uvredljivo i degradirajuće ponašanje. Nažalost, niko od njih nije preduzeo nikakve korektivne radnje. Supevizor stoga izražava žaljenje što je on lično morao da preduzme radnje u ovom slučaju. Skupština Distrikta nema postupak prema kojem može da sankcioniše kršenja člana 25 Statuta od strane svojih članova. Ne postoji efikasan pravni mehanizam za primjenu normi koje se nalažu članom 25 Statuta i za to da oni poslanici čije ponašanje je ispod te norme snose odgovornost.

Shodno tome, supervizor je takođe dao instrukciju predsjedniku Skupštine Distrikta da sazove komisiju da pripremi revidirani Kodeks ponašanja za članove Skupštine Distrikta, koji, između ostalog, uključuje odredbe za disciplinski postupak i kazne u slučajevima kada poslanik prekrši Statut distrikta Brčko ili Kodeks ponašanja Skupštine.

Supervizor podsjeća sve javne zvaničnike u distriktu Brčko BiH da se Statut i zakoni Distrikta i BiH moraju u potpunosti poštovati. To nisu stavke na meniju sa kojeg oni mogu da izaberu da primjene samo one dijelove koji se njima dopadaju. Stanovnici Distrikta imaju pravo da očekuju da se oni koje biraju i čije visoke plate oni plaćaju putem svojih poreza ponašaju pristojno i zakonito. Takođe je potrebno osigurati najviši kvalitet usluge stanovnicima Distrikta i očuvati povjerenje građana u Distrikt kao politički stabilnu i ekonomski privlačnu administrativnu jedinicu u BiH.